

In caffè dil Hafner da Bugnei

(fmr/hh) Il 19avel tschentaner produceva Sep Antoni Deragisch vischala a Bugnei en Val Tujetsch. L'arschella necessaria recaltgava el ella val vischinonta. Quella vischala vegneva lu vendida ell'entira Surselva. U che quei succedeva en ina da treis stizuns a Mustér, Trun e Glion ni cura ch'el mava duront plirs dis sin viadi. *Livia Deragisch* ei sefatschentada en sia laver da matura al gimnasi a Mustér dalla veta e la laver da Sep Antoni Deragisch, siu antenat. Ella ha era inventarisau la vischala ch'ei en possess privat.

Sils fastitgs digl antenat

En sia laver da matura ei *Livia Deragisch* sefatschentada dil «Hafner da Bugnei»

Hans Huonder/FMR

Vischala da Bugnei. Quei che para oz strusch imaginabel ei stau realitat il 19avel tschentaner. La maturanda *Livia Deragisch* ei sefatschentada dalla veta da Sep Antoni Deragisch, numnaus il «Hafner da Bugnei». Ch'ella ha gest eligiu quei tema per sia laver da matura ei tut auter ch'ina casualitat. «El ei nies antenat, secapescha pliras generaziuns anavos. Leutier vegn che la casa da nossa famiglia sesanfla gest el liug nua ch'el habitava e luvrava», di *Livia Deragisch*. La giuvna studenta ha vuliu saver cun tgei strategia e products ch'il «Hafner da Bugnei» ha saviu survivor e nutrir sia famiglia. Ella ei denton era ida alla tscherca da vischala fatg lu e ha constatau che bein enqual toc ei aunc avon maun. Vischala da Sep Antoni Deragisch ei buca mo en possess dallas famiglias descendantas dad el, mobein denter auter era el Museum La Truaisch a Sedrun, en claustra a Mustér ed el Museum retic a Cuera. «Bia vischala ei mantenida bein, enqual toc ha in pign donn vid igl ur», di l'autura dalla laver cul tetel «Veta e vischala dil renomau Hafner da Bugnei». La vischala ei la perdetga autentica dalla laver e digl inschign da Sep Antoni Deragisch. Quella vegn secapescha conservada oz cun gronda precauziun.

Tgi era Sep Antoni Deragisch?

Livia Deragisch ha partiü sia laver en plirs secturs. D'ina varta ha ella vuliu saver co Sep Antoni Deragisch ha saviu nutrir sia famiglia cun sia laver da figulant, da l'autra vart tgei ch'el ha insumma contonschiu en sia veta. En mira ha ella priu surtut la laver da figulant il 19avel tschentaner, mo lu era descret ed inventarisau la vischala fatga dad el ch'ei oz en possess privat. La fin finala ha ella era priu sut la marella il model da fatschenta cun agid da fontaunas originalas da Sep Antoni Deragisch che ha viviu da 1815 entochen 1882. La laver da figulant ch'era extraordinaria en Surselva ed il stil specific dil «Hafner da Bugnei» ha *Livia Deragisch* intercuretg cun agid digl archeolog *Andreas Heege*. Da principi vegn la vischala ch'ei oz aunc avon maun classificada en duas parts: Ina garnitura e vischala pil mintgadi sco cuppas, tagliors ni era broccas. Sep Antoni Deragisch produceva vischala sempla ed adattada bein pil mintgadi, denter auter era parlets d'aua benedida. Medemamein ha el construiu pegas. Il mistregn d'uler haveva el empriu tiel vischler Fidel Wölfle a Wangen egl Allgäu en Germania. Suenter quei emprendissadi eis el s'installaus en sia patria a

Bugnei. En in fuorn construiu sez barschava el allura la vischala formada ord arschella recalgtada ella Val Bugnei.

Stizuns e sin viadi

Cun la producziun da vischala haveva Sep Antoni Deragisch success e ses products vegnevan apprezzai dalla clientella: «El vendeva quella ell'entira Surselva. A Mustér, Trun e Glion haveva el stizuns. El *era* denton era adina puspei per enzacons dis sin viadi per offerir sia vischala.» Per sia lavur ha Livia Deragisch examinau fontaunas documentaras fetg veglias e ha sfegliau en archivs. Cun agid dil «Hausier-Patent» ha ella era saviu intercurir il muster da viagiar dad el en connex culla vendita dalla vischala. In auter document precius en quei connex ei il cudisch da fatschenta dad el staus. En quel eran ils prezis dalla vischala nudai. Quels prezis ein la fin finala vegni cumparegliai cul fegl da taglia da Sep Antoni Deragisch digl onn 1876. «Aschia eis ei stau pusseivel d'intercurir schebein el fageva veramein gudogn cun vender vischala e sche quei gudogn tunscheva per nutrir la famiglia cun tschun affons», di Livia Deragisch. L'autura constatescha: «El ha surviviu cun sia lavur da figulant perquei ch'el menava dasperas aunc in bein puril. Aschia ei quella entrada stada sufficienta per nutrir sia famiglia.» Grazia a sia lavur profunda e fundada dat ei ussa in document cumplet davart la veta e la lavur da Sep Antoni Deragisch. Suenter sia mort ha il fegl Sep Antoni menau vinavon plirs onns il luvratori da figulant. L'entschatta dil 20avel tschentaner – entuorn 1918 – eis ei lu denton iu a fin cun quei artisanadi singular e pretensius a Bugnei.